

章邱縣鄉土志門類目錄

卷上

歷史


政績錄

兵事

耆舊錄

人類

戶口



歷史

章邱縣隋開皇十六年置

未置本境以前

少昊氏為夾鳩氏之墟

虞夏殷皆為青州之域虞夏隸季荊氏殷商隸逢伯陵後隸薄

姑氏

周仍青州成王滅薄姑氏封師尚父屬齊國春秋時仍隸齊邑
名賴戰國隸田齊

秦屬齊郡

漢屬青州部濟南郡文帝四年封齊悼惠王子安為陽邱侯景
帝四年嗣侯偃坐出界國除改為陽邱縣又分置朝陽縣管
縣獠縣並屬濟南郡東漢省陽邱獠二縣入東朝陽即前漢
之朝陽屬濟南郡

晉曰東朝陽樂安國省管縣

宋屬青州濟南郡曰朝陽

北魏屬齊州濟南郡曰朝陽

北齊屬齊州曰高唐

既置本境以後

隋開皇十六年改高唐曰章邱屬青州部齊郡

唐屬河南道齊州濟南郡

五代仍唐舊


宋屬京東東路濟南府

金屬山東東路濟南府

元屬山東東西道濟南府總管府

明屬山東布政使司濟南府

國朝因之屬濟南府



政績錄

興利

漢劉寵字祖榮東萊牟平人桓帝時以明經舉孝廉除東平陵令仁惠為吏民所愛母疾棄官而去百姓將送塞道車不得進乃輕服遁歸歷豫章會稽二郡太守累官至司徒太尉免歸無貨積以老病卒於家

金李山本邑人寶慶戊子任縣令能保聚生齒元尚才英字世傑大德五年由樞府掾任縣尹盡心牧愛一介不取舉廢必行去後民刻石頌之祀名宦

明賴原裕處州人由通經儒士洪武六年任本縣縣丞蒞政寬裕潔已愛民凡公出視地遠近裹糧而行擢戶部員外郎祀名宦

吳以辰松江人由人材洪武三十三年知縣事秩滿士民脫鞶懸於縣門

田疇字耕治交城人監生正統六年知縣事好善抑強廣儲節用被特薦以登州府通判管萊陽縣

李燦字文玉咸甯人舉人成化八年知縣事救荒有惠績祀名宦

韓福字德夫陝西人進士成化二十一年知縣事奉公潔已吏畏民安行取監察御史祀名宦

程熟字吾潭開州人進士嘉靖三十三年知縣事勤慎清修忠誠明決蒞事甫六月百廢皆興以馬匹臆息滋生蕃盛上憲嘉獎之

賀賁字洪濱靈寶人進士嘉靖三十五年知縣事慈祥豈弟民歌父母焉行取南京江西道御史

劉田字見川南陽人進士嘉靖四十三年知縣事遇事明敏秉心公恕民困以蘇

李臣之嵩縣人進士萬曆三年知縣事力任勞怨築修石城足資保障擢武昌府同知祀名宦

呂秉彝字性之真定人進士正德四年知縣事慎獄均賦崇儒恤孤積粟賑乏築城禦患善政懋績交章上聞擢山東道監察御史

陳東光字平岡鈞州人進士由翰林嘉靖二十五年知縣事留心民物平易可親擢大名府同知官至都御史

茅國縉歸安人進士萬曆十一年知縣事先是邑中賦役繁重民多鬻田產轉徙國縉立條鞭法革除一切富戶里甲歸之

召募數年後閭閻殷富百姓德之有去思碑行取監察御史
祀名宦

張企程洋縣人進士萬曆十八年知縣事與民休息積貯振作
建義倉三十所又設社學十餘所延師課民間子弟有絃誦
之聲去後百姓肖像尸祝之行取禮科給事中祀名宦

董復亨元城人進士萬曆二十一年知縣事博學有重名江陵
柄國時召之力辭不往政暇手不釋卷尤加意作人視若子
弟清操不滓於利祿若將浼焉輯縣志三十四卷行取禮科
給事中天啟年祀名宦

游漢龍徽州人進士蒞事勤慎廉潔惠民有去思碑萬曆庚午
年建

牛成龍保安人恩貢生萬曆三十九年任縣丞清苦著聞士民
感德奉檄收泰山香稅一塵不染多銀萬二千五百兩人尤
難之

趙起羅山人選貢生萬曆四十七年任縣丞廉靜自持權知縣
事時一稅未徵一錢不罰民皆稱之

李景濂洋縣人進士崇禎四年知縣事秉性寬厚愛民禮士有
循吏風擢翰林院編修

孫自然高苑人貢生崇禎年任訓導醜厚篤摯有古人風擇諸生中素行端方者與之遊廉潔寡欲足為師範

國朝史在篇餘姚人監生康熙三十五年知縣事興利除弊洞悉民隱合邑以真父母稱之有祠在史公河祀名宦

潘維颺惠安人舉人康熙五十五年知縣事在任未久善政甚多民咸稱之

席芬吳縣人優貢生乾隆八年知縣事興利剔弊吏肅民懷玉棟字雲浦滿洲正白旗人乾隆五十年知縣事五十一年歲大饑賑濟有策全活無數

李文耕雲南昆陽州人進士嘉慶二十四年知縣事政尚寬裕而實心愛民在事未久民咸思之

何家駒字春谷安徽廬江縣進士道光二十年知縣事居心忠厚喜培養士類以舊書院太隘集紳董另拓新規未及告竣而去迨後書院規模廓充實家駒創建之力焉

張樸字小波直隸定州舉人道光二十八年知縣事廉潔愛民案無留牘修補城垣新葺文廟建立節孝總坊舉行賓興典禮書院課士捐助膏火邑中支應兵車久為民累定為僱車發價之例咸豐中髮捻擾東境地方匪徒徃往藉端滋事嚴

懲首惡亂萌遂戡升授四川順慶府知府同治五年祀名宦
去害

漢高柔字文惠陳留圉人也父靖為蜀郡都尉柔留鄉里柔從
兄幹袁紹甥也在河北呼柔柔舉宗從之會靖卒於西州時
道路艱澁兵寇縱橫而柔冒艱險詣蜀迎喪辛苦荼毒無所
不嘗三年乃還漢獻帝建安十年曹操平袁氏以柔為管長
縣中素聞其名奸吏數人皆自引去柔教曰昔邴吉臨政吏
嘗有非猶尚容之况此諸吏於吾未有失乎其召復之吏還
皆自勵咸為佳吏柔處法允當事無留滯辟為丞相理曹屬

司馬芝字子華河內溫人也少為書生避亂荊州於魯陽山遇賊芝坐守老母賊至以刀臨芝芝叩頭曰老母惟在諸君賊曰此孝子也殺之不義芝以鹿車推載母居南方十餘年躬耕守節曹操平荊州以芝為管長郡主簿劉節舊族豪俠賓客千餘家出為盜賊入亂吏治芝乃馳檄濟南具陳節罪太守郝光素敬信芝遷廣平令征虜將軍

宋王仲寶高密人仁宗時任縣尉以捕盜六十餘人有功改左班殿直後領濮州團練使

趙不羣太宗六世孫欽宗時任縣令縣當山東河北之衝時有

寇警不羣募五千人增城浚濠為戰守備敵攻圍兩月不能
下後遷維州通判

李仔宏本貫未詳興定二年任縣令威信大行奸慝屏息
元張銀兒世祖丁酉年任達魯花赤治政有聲吏民畏服公解
皆其重建

耿繼祖深州人至元五年任縣尹蒞政嚴肅

明張慶字景祥鈞州人舉人成化元年知縣事循禮奉公人不
敢干以私發奸弭盜路不拾遺擢東昌府同知祀名宦

董文案字雲溪順天府人進士嘉靖三十八年知縣事革火夫

省里甲強宗巨猾皆畏其風裁行取監察御史擢參議官至
參政

白麒字子仁盧龍縣人進士正德十五年知縣事威行政舉士
民安之

孫應奎字文宿河南衛人進士正德十六年知縣事剛而有守
士民畏服行取兵科給事中

祝文冕字宗周興化人進士嘉靖五年知縣事廉惠仁厚積粟
捕蝗大有功於民

趙瀛字文海三原縣人進士嘉靖十年知縣事崇正祛浮平賦

息盜捕蝗尤力邑人頌之祀名宦

金九成字攝山武進人進士嘉靖二十九年知縣事有清操扶善抑強士民德之擢南京戶部主事

朱大典金華人萬曆四十六年知縣事慕登萊山川之勝每假公事遊覽輒繪圖藏之行取兵科給事中累官至山東巡撫適值李九成圍萊州大典遣兵擒之皆為今時所廵歷也

王國太平縣人萬曆年任主簿解水次倉糧堅却常例弗受勤勞感疾歿于德州櫬歸之日囊空如洗百姓哀之

國朝鍾運泰錢塘人拔貢生康熙二十三年知縣事方下車之伊始

召紳士父老誓於城隍廟示不可干以私章邑舊有祿折一項每畝徵米數合臨折一項每石徵銀八錢俱別立廩庫分項完納名目繁多民苦催科之擾運泰為併歸丁地衆俱稱便又章邑每歲例買白布解部按戶攤備運泰自召機工開局織製其他濬河道以除水患修城池以資捍禦補遞馬以免騷擾纂志乘以足文獻善政孔多不媿良吏云

張萬青字夢田浙江分水人乾隆乙丑進士初授范縣令旋調章邱壬申蝗蝻為患懸賞力捕自日中至晡不食民咸感激趨事歲以大熟癸酉夏旱徒步禱百脈泉甘澍立沛又設義

倉修書院善政不可勝紀邑人甯之焚蕉汝變為之傳
程義莊孝感人進士乾隆六十年知縣事戢暴安民四境帖然
人皆稱治

陸溥靈州人舉人嘉慶九年知縣事安良除暴遇事明察人不
敢欺在事未久民咸思之

傅士奎字瘦石大興人舉人嘉慶二十四年知縣事政尚寬裕
而制治有法強暴斂迹邑人稱之

李代霖直隸清苑縣舉人道光二十六年任攘除奸民扶植善
類尤以振興文教為急務有母在堂時以做好官相勉勗問

好官之道如何曰使善人感之惡人忘之如是而已

陳來忠字笏山直隸易州舉人咸豐十年知縣事實心愛民減
裁糧價值撙節逆猖獗防守兼施民皆德之

蔣慶第字著生直隸玉田縣進士同知六年知縣事有膽畧任
事剛果法令必行值撙匪擾邑境北守河南防關籌兵籌餉
事多棘手皆悉心經理事定而民不擾又捐廉積穀以備荒
年添助膏火以勵多士至今已踰四十年士民沐其德澤感
念不置因立祠祀之

全士錡字鑑三直隸涿州進士同治十年知縣事居心剛直不

避權貴折獄敏捷吏胥奉法嚴責捕役盜賊不敢入境士民
為立去思碑

聽訟

北周郎茂字蔚之恒山新市人大象中為衛國令時有繫囚二
百茂親自究審數日釋免者百餘人歷年詞訟不詣州省有
民張元預與從父弟思蘭不睦蘇尉請加嚴法茂曰元預兄
弟本相憎疾坐得罪彌益其忿非化民之意也於是遣縣中
耆老更往教諭道路不絕元預等各生感悔詣縣頓首請罪
茂曉之以義遂相親睦稱為友悌

後周張德昇清河人顯德三年任縣令達於政事妙有神機毀
淫祠崇文教

金完顏問山都人承安元年由律科忠顯大夫任縣令盡心治
盜大著聲績

范天錫覃懷人由詞賦第泰和七年任縣令豈弟慈善人皆懷
之

王儲中都人由詞賦第朝請大夫貞祐三年任縣令有政事之
才

李惟肅真定人大德丁未年由中書掾任縣尹廉恕剛斷先教

後刑嘗指繡江語人曰吾惟飲此水耳因築亭曰飲江祀名宦

李彥表字儀伯汴人至正五年任縣尹政聲為諸縣最擢江南行臺御史

明劉顯宗衢州人由刑部掾洪武十年知縣事剛果明肅有治劇之才祀名宦

陸里字希遠宜興人進士宏治元年知縣事公廉勤慎有循吏之稱蒐摭事實叙修邑志四卷

張一通字洪濱甯津人進士嘉靖四十四年知縣事徵租有善

法聽斷無遁情平役懲奸民有慈父之稱

昝如思三原縣人進士嘉靖二十年知縣事以清廉著聲行取

監察御史

郭綸本貫未詳萬歷年任縣丞廉介明決擢四川知縣

丁寅陳州人萬歷年任縣丞資性明決有幹劇才

許承家井陘人萬歷年任主簿一錢不取以廉吏稱

國朝戴瑞壽昌人監生康熙三十一年知縣事緩催科除雜派居心

寬仁處事明決有戴青天之稱建有生祠在女郎山後

蔡應彪仁和人進士乾隆十三年知縣事理煩治劇政簡刑清

邑人士皆心折焉

張秉魯字鈍夫富平人舉人嘉慶五年知縣事聽斷明決崇尚
文教士民畏而愛之

吳璋浙江人道光元年知縣事八年再任外嚴內寬片言訟決
恤孤貧繕祠宇置義塚倡捐俸錢纂修邑乘凡有裨於民者
巨細必行境內帖然

玉簡滿洲廂白旗人道光二十三年知縣事聰明廉介實心任
政遇有疑獄輒微服入鄉親自訪察以故豪猾皆斂迹前任
何建修書院未竣因踵成其事復增修考棚十餘楹士林戴

之卸事之日民留其靴以誌他日遺愛云

兵事

宋景德三年以章邱縣置清平軍熙甯二年廢軍復為縣
明正德間流寇張興張旺等三千人屯駐埠村分掠四出有七
十餘騎出抵大冶邑人馬廣字濟周勇決有膽畧擊賊賊皆
驚散嘉靖丙午春萊蕪巨寇吉闕等二十四人白晝劫人亦
據埠村為巢廣令長子為應躬率精勇至寇所遠射近屠止
逃一崔倫餘俱肝腦塗地矣次年有楊龍楊虎兩兄弟誓眾
二十餘人晝劫鄰村范思升已有救援者廣從而助之二楊
殪死餘悉逃竄自是絕警者十七八年李太常開先為之傳

天啟末寇近章邑鄉民多走避長白山邑人孟漢臣率衆力為護守民皆賴之寇平事聞給冠帶並以公正忠信遍獎之闖季之亂人不聊生邑人李顯華字太雅武勇有智謀從征白蓮教有功賜授守備劄符章境賴以安全

國朝咸豐十一年捻匪自西南一帶竄入邑境連陷城西馬棚莊城北張官莊土圩殺傷甚衆城北劉王四莊人素嫻拳勇之技與賊力戰自辰至酉殺賊數百人嗣賊大股繼至衆寡不敵村中老幼殺無孑遺賊聞僧忠親王統兵至始東竄又捻匪自濟南東竄邑人督率練兵在歷邑之龍山鎮唐王

道口韓家橋一帶防堵設險據守其後賊出敢死軍衝突而
前衆遂不支陣亡數百人其在龍山鎮陣亡者如廩貢生楊
注東廩生焦肇京焦應麟鞏爾藩從九品王存焜高秀升監
生張明詩許利統楊學順張芳桂附生魏炳文其在楊湖莊
陣亡者如附生韓承銓從九品韓承夢監生韓殿策其在唐
王道口陣亡者如附生韓秀華監生萬國良至於各莊陣亡
之人則有若河南即用知縣在籍舉行團練進士鄭芳蘭陣
亡在道流莊附生袁鳳圖陣亡在張官莊附生辛人龍陣亡
在王家橋附生鄭長清陣亡在韓家橋軍功議敘八品職銜


旨准其承襲雲騎尉世職

王景瑞陣亡在大溝堦凡此殉難諸人均奉

李維孝從九洩清莊人咸豐十一年值捻匪東下路經村外伏
鎗中其前騎賊即退又禦賊於龍山衆團死傷無數獨整隊
而還賊不敢犯南擊賊於萊蕪之上游莊賊衆蜂擁而來令
數十人伏暗處用大炮連擊賊疑有伏遂止又擊賊於回村
橋奪得牛驢三十餘頭救得被裹人無數

同治五六年間匪擾淄川長山一帶與章邑接壤邑人防縣南
之錦陽關及鄒平之啞婦口匪蹤未得闌入始東竄

同治六年匪首賴文洸率衆匪在各村劫掠後官軍自西來賊
乃東竄帶兵官楊統領統兵數千在縣城東關南關立營防
守賊遂未得西竄



耆舊錄

事業

漢終軍字子雲濟南人傳載漢書東平陵舊有終氏終軍墓亦在境內唐元和前地屬章邱

隋房彥謙字孝冲傳載隋書本清河人七世祖諶遷於齊因家焉墓於縣西南六十里趙山之陽

唐崔從字子久融曾孫傳載唐書

崔能字子才融曾孫傳載唐書

宋李惟清字直臣下邑人父仲行為章邱簿因家焉開寶中以

三史釋褐為涪陵尉答巫覡給民醫藥宦官督木不法奏殺
之改御史請減鹽價復酒耗遷給事充鹽鐵使累官刑部侍
郎贈戶部尚書惟清為人倜儻自任有鉤距所至稱強幹子
永錫永德

劉庭式字得之舉進士蘇軾守密州庭式為通判初庭式未第
時議聘鄉人之女未納幣庭式及第女以病喪明其家貧甚
弗敢多言或勸娶其幼女庭式曰吾已許之豈可負哉卒娶
之生數子後死竟不再娶軾問之曰哀生於愛愛生於色今
君愛何從生哀何從出乎庭式曰吾知愛吾妻而已若緣色

而生愛緣愛而生哀色哀愛弛吾哀亦忘則凡揚袂倚市目
挑而心招者皆可以為妻也耶軾深服其言庭式後監太平
觀老於廬山以終

張中宣字元忠虞曹員外郎嘉祐五年執親喪居里率同人剏
立夫子廟并左右室若干楹

穆端字伯初性純孝歿後王壽卿為墓表

孟趙鑑字擇善載金史循吏傳

劉熙字明遠有才學以實財雄鄉里明昌初大旱發粟濟貧遠
近疏戚咸賴焉子珂居是喪不御酒肉三年太和間自冬至

春大雪珂為粥於門以食餓者

張仲金季率諸子力田置家塾申孝弟之義里俗為之一變

王宏字彥博幼敏慎工書通習吏事補縣吏尋擢郡曹俱以廉
平稱興陵朝越王出知濟南選充書掾言動端謹王雅重之
將薦之朝辭不就退居鄉閭間平心率物人有爭訟者輒訴
於門宏必諭以禮繩以法要底於無事其有悍戾弗率者更
飲之酒人亦化之

元高顯高唐寨人性剛毅正直官監軍以擊棗陽批抗亡子聚
承襲

高聚顯之子承襲父職加軍民鎮撫兼兵馬事在官二十餘年著廉潔名子五人長子全次子進最著名

高全聚之子承襲父職擊釣魚山當史丞相前偏之任歿於陣高進弱冠襲父職充百夫長圍李壇守沂州修郟城皆有力焉後應正陽之役由安慶府渡江到丁家洲獲功屯鎮江攻常州青沙門獲功授樞密院劄符掠杭州渡錢塘江到天台嶺經福建諸路且戰且進殺敵無算還守淮泗未幾復隨劉招討取三峯寺討江山寨收黃華賊既定還鎮淮安授散官進義校尉收鍾明亮事畢於鳳凰山開治河道上海巡鎮而還

進被堅執銳攻城野戰三十年百無一失歿賜祭葬

趙通少魁岸有膽畧一時豪俠皆歸之金季河朔無主萬民嗷
嗷不自保通慨然為倡鳩衆結寨柵以保護之時濟南王賚
授公以都統備東西青齊之衝據山傍險以為固至戊子歲
元帥收復山東率衆歸命授右監軍章邱縣令設方略平益
都師還帥欲引通見上通曰濟南左右當安集恐去後有反
復帥首肯之遂留通濟南行省依舊監軍後行省南征有功
授給劄件銀符印信旋以病告長孫王承襲克紹前列至中
統壬戌益都李壇作亂盜據濟南上徵燕南諸路軍兵築夾

寨以困瓊玉疾次孫璧代行都督行省因奏璧有功特贈宣命銀符印信

國朝李之紳李燧第三子少孤家貧母多病侍湯藥衣不解帶者百五十餘日不入妻室者八年後母年益衰動履必躬親調護三十載如一日母年百有二歲建坊及歿廬墓三年又設鄉塾訓後生先後邑令匾獎其門曰孝子乾隆四年奉

旨建孝義端廉坊

劉自平字安然居西營莊少喜讀書後以家貧治生有子五人使各執一業建成立悉以家事付之日往來里黨間以排難

解紛為已任所居村十數里間無訟公庭者

高冲父宗嗣兄銓家頗裕父母病湯藥起居未嘗一假手於婢僕與銓友愛甚至家事銓獨任之冲得專務儒業乾隆辛酉舉於鄉壬戌會試後聞兄病即歸同輩勸少待冲曰吾賴兄成立不忍以功名故或薄也比揭曉列中正榜例選教職以先歸扣除冲無悔意及析居有良田頃餘盡與姪輩李慎修為之傳

宋銑字金聲任東頓邱莊歲貢生天性至孝母病泄寢不安席者百餘日心力俱瘁因而兩目瞽年餘忽開朗如常人又好

獎勵後進嘗設義學於家里中貧不能讀者招入教之黃解
莊山村銑為鑿義井一方賴之

李連朝字俊昇有異稟年十七為郡庠生旋食餼早孤事母孝
乾隆乙未其兄容死瀋陽母日夜悲痛念家貧無歸葬期連
朝百計拊擋以家事委子姪往尋既達瀋陽值山水漲發聞
關道路竟扶其兄櫬以歸母年八旬而終哀毀盡禮嘉慶甲
子列恩貢科第

鞏學湯字敬躋性孝友其妻焦亦善事舅姑家素貧薦愉進欲
必當親意親歿哀幾滅性兄弟蚤析產兄亡孀孤伶仃弟亦

喪婦遺子女六學湯復引同居撫諸猶子逾已出生平好讀
書每言經史大義以孝弟忠信為實學里閑有雀鼠訟學湯
至輒解終年六十子存乾存端存正存方諸生乾隆乙卯知
縣嚴孫貽為作鞏處士傳勒諸石

羅開勲字銘書號桐圃先世務本業其祖廷秀愛文學令勲就
舉子業竭力攻苦嘉慶戊辰舉於鄉以貧故館齊河會父病
星夜馳歸病劇請減已算以禱於神尋愈嘗賦百里負米詩
以自勉

焦汝均性端嚴訓子孫以義里鄰有居室不完耕獲不時者每

出錢粟補助之壽至八十餘

高赤城字即震國學生援例授兵馬司副指揮城工議救員外郎防堵晉四品銜為人開豁有志略歲同之際逆匪擾亂先時附城無圩咸豐十一年倡捐修築圩將成而賊至率集鄉衆守禦先後兩被擾全活數萬餘家縣南錦陽關為古長城遺址同治五六年間捻匪自南來乃先事營築防堵又率鄉衆防守鄒平之啞婦口以故賊匪未得闌入邑境得免於難居恆急公好義若城垣河道學宮祠宇書院中講堂號舍皆其首議出資而力為之者也其他濟困扶危有禪風化之舉

尤不可枚舉邑之人識與不識耳其名者無不愛之敬之推
許如一也同治十二年卒鄉人稱為端敏先生

曹毓琇道口莊人與弟毓璋友愛最篤出必携手入必相偕於
別墅中置一大榻共寢起十餘年毓琇卒其妻尚在毓璋母
事之現已八世同居子侄輩亦皆勤睦成風克繼前型

時振元大溝涯人同治六年捻匪犯境其父進德被賊圍困振
元見之知有父而不知有身操戈直前與賊格鬪將父救出
己身遂為賊所害

胡運靄字清泉居母喪時寇賊入境逼近靈前舉家奔散獨守

靈柩三晝三夜號泣不止賊相語曰此孝子也宜遠去勿使懼

欽賜匾額曰孝友可風

高鴻嶺性孝友同治丁卯捻逆北竄鴻嶺與叔兄慶齡並被獲賊索銀兩馬匹贖命留其兄慶齡作質顧念取者難求質必死鴻嶺因給賊曰余年幼事多不經釋吾兄謀之必能勝任賊信其言乃遣其兄而質鴻嶺兄歸設法營謀竟多掣肘賊待不至拔刀斫之賊他去移時復懸家人尋覓之昇之歸問何故脫若兄泣曰吾之同父兄弟二吾死尚有繼世者叔之

子嗣一兄死則奉祀無人矣吾以代吾兄者全吾叔雖死又何悔焉

李若馨字桂山邑附生居大站莊以耕讀為業蓋士而農者嘗謂人生天地間不能出而問世則莫如退修為鄉里之善人故其家居教授遊其門者多成名晚年耄而好學每遇寒士不計脣脯性爽直一介不苟取鄉黨有事竊排難解紛焉又曩年德人開辦膠濟鐵路中由邑境若馨奉邑尊楊諭在明水鎮立局稽查交涉事件以排外人於地方頗有裨益且興學為一邑之倡每以風氣初開不能灌輸文明為恨費志以

歿至今人猶悼惜之

孟瑞箴字銘心傳珊次子邑之舊軍人性孝友席豐履厚自奉
儉素有義舉輒先之光緒十五年春東省歲饑巡撫張勤果
公奏請舉辦平糶瑞箴倡捐巨款由湖北江蘇各省運米以
資接濟後十年歲又饑復辦理平糶自認賑款一萬四千餘
金邑北境瀕黃河工款需急與胞伯傳珽堂弟繼筠等慨輸
萬金以助要需每於河決被災之區施放餼糧繇衣活人無
算尤器重文士其無力讀書者輒量予資助建立繡陽義塾
應課者擇尤優給膏火以示鼓勵他如修文廟建尊經閣堵

繡江河決口修舊軍鎮圩牆分置明水鎮一帶義田掩理枯骨見善勇為類如此邑中有大役舉他人所躊躇莫決者往往得其一言而定歷蒙大府保薦以知府候選加鹽運使銜歿後識與不識同聲嘆息鄉人稱為端惠先生

李正嗣生雍乾間闕五里之王莊人天性篤厚能以孝友傳家今其元孫衛千總李殿章並殿章之姪廣珠至廣珠之曾孫其驥凡九世同居親丁百餘口一門共爨家政井然綜核善舉如捐賑歛立義學贍族卹貧等事前山東巡撫任中丞曾賞有惠周井里匾額以嘉之又廩生王祖謙增生王宇棟附

生趙元英等曾具稟以李氏九氏同居籲懇由縣轉詳當蒙
邑尊楊調驗宗譜書送風希百忍四字榜其門一鄉之人皆
以為榮

學問

周鄒衍史記傳曰齊有三騶子其前騶忌其次即衍衍睹有國
者淫侈不能尚德乃深觀陰陽消息而作怪迂之辯終始大
聖之篇十餘萬言其語閎大不經必先驗小物推而大之至
於無垠

漢吳進字升臺東平陵人後漢孔宙治嚴氏春秋進為其門生

蓋傳經之士

梁劉昭字宣卿高唐人載梁書文學傳

唐崔融字安成齊州全節人傳載唐書

員半千字榮期齊州全節人傳載唐書

宋李格非字文叔載宋史文苑傳

明李淳年十五為諸生試輒前列及年四十始領鄉薦天性孝
友善解說經義在都時高麗使臣叩問書史疑事淳應答如
響使臣為之折服

李開先字伯華淳之子生而卓異七歲能文嘉靖己丑進士是

時北地李獻吉信陽何仲默先後去世而晉江王思道毘陵
唐應德倡論謂獻吉即名高一代然於文章正法藏不免仍
隔一塵於是盡洗詰亢之調而一歸和雅開先與吉水羅達
夫平涼趙景仁復左右之李何文集幾於遏而不行一時有
九才子之目又工為金元諸曲嘗奉使關中康德涵王敬夫
輩夙擅才名意不可以一世見開先詞皆折節倒屣不敢居
前輩初除戶部以才望改吏部至選郎轉太常寺少卿為夏
相所忌罷歸優游林下近三十年開先才敏捷每為文一篇
輒萬言為詩一韻輒百首皆縱筆而成不為嶮巖刻深語而

有天然自在之趣性好客座上常滿所著閒居集揭要集經義待質諸書行於世海內稱為中麓先生

楊選嘉靖甲辰進士初授行人嘗使雲南却黔國公之餽轉御史按畿南郡課羣士讀書恆陽書院轉副使備兵易州去而易州人立祠祀之轉都御史巡撫大同解右衛之圍上賜金幣丁母憂以邊事奪情起復轉兵部右侍郎總督薊遼屢捷又陣獲通罕為質復賜金幣癸亥墻子嶺失事責在參將兵察與巡撫而本兵有黃尚書者與選素有隙指通罕為勾引遂伏法海內冤之所著有按畿南郡諸稿藏於家

國朝袁之升字吉南生而穎異弱齡通毛詩左傳史漢諸書年二十
為諸生讀書白雪書院一時如孫子勦劉大穀趙泰臨輩皆
嘆服衛方伯延以為師著有四書平語變卦說纖批左傳史
記杜詩南華平語凡數十種晚年精於易學預知歿期益都
王元再記其行事於同學譜志中

胡予襄號易堂世藻孫舉人辛巳舉中正榜以內閣中書舍人
改補國子監學正升助教分校四庫全書頭分告成頌

御製燈夕聯句詩冊八絲緞雕檀鑲玉如意龍尾石硯天章雲漢筆
墨各件擢刑部主事多所平反後以疾歸壽七十有六其弟

予翼仕績有傳予弼號松岩恩貢生並工文當時有章邱三胡之目

孟雲峯字嵐亭初由廩生任昌樂訓導後官戶部主事乞養歸里繕宗祠置祭田精岐黃設藥餌濟人尤能事繼母以孝嘗手輯古今倫常事十餘卷曰人鏡集

王應植字嘉樹號宜軒舉人本籍浙之秀水縣自其父遷章邱遂家焉性聰敏嗜學工詩古文詞家貧無僮石儲事祖母郁母張備極孝養撫季弟成立入膠庠以大挑二等授在平訓導丁祖母憂遂里居奉母邑令重之延主繡江書院講席既

而選授海陽教諭以母老多病辭不赴官生平廉介自持慎
交游嚴取予重氣誼尤善解經義於諸書無不淹貫有弟子
百餘人如李廷際馬官龍鄭芳蘭焦友麟輩皆先後擢科第
而應植公車十上竟坎壈以終著有四書摘解宜軒雜詠詩
藏於家

劉家麟字仁夫樂山其號也性嚴正與人交不苟隨學問品行
闔邑推重中嘉慶丙子科解元道光癸未與堂弟家龍同榜
成進士以知縣分湖北任巴東長陽等縣知縣不媚上官惟
孜孜以愛民為務百姓作德政歌以記之不數年去官小民

遮道留行至有泣下者回籍後時闔邑因繡江書院舊制過
隘另拓新規諸事草創未易經理延請家麟監理書院以為
多士矜式教授生徒朝夕不倦論者以為有胡瑗之風焉著
出山為小草還山後集台青山房唱和詩集行世

劉家龍字海冠號雨亭又號左青城南西營莊人嗜讀書過目
輒不忘嘉慶丁卯舉人道光癸未與堂兄家麟同榜進士已
亥選河南新安縣知縣時鄰境澠池縣土豪因漕米滋事府
憲派兵彈壓經新安家龍謂統領曰澠池勢成騎虎兵至必
激亂余素悉典史某公有膽畧能任事請函使勸諭必可解

若無效君再往未遲逗留之罪余自任之固留統領於署自
為書馳遞澠池典史某持書登城慷慨示衆以書投城下衆
歡呼樂罷圍頓解越數日署理澠池縣某公至新安以民情
洶洶恐多反覆不敢往公曰澠池所以未靖者懼有他變耳
速往安集必無患遲則生疑因強之使行至果瓦解矣在官
數年無滯獄無濫刑惟積惡刁健之徒必重懲之己酉俸滿
引疾致仕後改教授生平著作甚富有迷花堂十八種河清
集左青託韻算學大成棗花軒過意軒容縉集萊蕪土產女
十忙回文詩論語連珠拋磚集諸書均有存稿待梓

孟傳鑄字劍農號柳橋道光丁酉拔貢學問淵博經濟宏深肆
力於詩古文詞奧衍數竒見者有望洋之嘆筮仕直隸四任
州倅三權邑篆所至有政聲時長山王公榕吉備兵大名素
稔其能邀王軍謀辭不獲已始就之出險入危逆氛以次盪
平運籌決策傳鑄之力為多事平論功辭不居退居趙州冷
署為中隱塢三楹聽政之暇嘯詠其間諸生從肄業者慕其
清潔比之陶靖節周濂溪云著述甚夥均未付梓惟西征集
西行紀程二書刊行歿後王公榕吉為之傳

附名宦

明滿福周一名甫生器宇凝重通經史練達時務縣尹李彥表
聞其名舉為亭老元季政舛俗橫民多在濫福周悉心平之
洪武初以人才應召授浙江左布政使聲譽藉甚居七年以
目疾解組歸

張汝蘊字子發號逢源萬歷庚辰進士宰東安首治猾胥擒劇
盜境內獲安渾河溢為文以禱築土堤亘二十餘里河以不
害調獻縣至則汰積收公審編均驛騎雪唐郎中齊秀才兩
家獄久之新廟學葺公廨修橋梁繕斥埃以及文昌閣文翰
亭職官題名碑皆手自記勒邑故無志匝月成書秩滿治行

為三輔最遷南京工部主事時弇州為大司寇見汝蘊所為
詩嗟賞不已尋居父母憂服除補戶部主事晉員外郎中視
驗糧廳積弊盡去出監天津倉錙銖無染值倭犯朝鮮陳奏
調班軍借漕糧固守備飭營壘數事俱准遷寧夏叅議督撫
奏以監司兼部務留之津倭平與賜金列郵傳苦驛騷為定
程品非信節不得橫索稅監王朝激變某帥陳兵待之汝蘊
反覆開說事遂寢宦者馬堂繼至手卮酒慰勞期無擾百姓
宦者悅服減郡稅數萬緡歲大稔請於上臺出帑金賑濟復
大疫捐貲散藥全活甚衆遷陝西按察司副使士民詣臺挽

留不能得哭聲震野行次邠州以疾歸旋卒所論著甚富其
任優應急二種已刊行臨邑邢侗銘其墓

國朝焦毓慶字善餘順治甲申拔貢選授江西永新縣令時江右初
入版圖居民寥落毓慶之官後清白自誓緩催科勤撫字民
歌樂只馬值金逆之變毓慶慷慨登陴力窮援絕遂以身殉
妾劉氏自縊其舅氏張驪驤僕劉治張乾俱死祀鄉賢乾隆
六十年奉查殉節後裔嘉慶七年准毓慶六世孫希和襲恩
騎尉世職罔替

李縉明字仲卿順治己丑進士初官大理覆奏詳覈稱明允督

理中河巡察江北釐奸剔弊興利惠民尤究心經史故分校
北闈所得皆知名士居官毋購求遺書手不釋卷一如諸生
時致仕後構別業曰嘯園著有蓄德錄彭門腐草字學蠡測
嘯園集等書司寇高珩為之傳

王濂字樵嵐順治戊戌進士授滎昌令滎昌為蜀巖邑值兵燹
之後城中戶不滿百濂至招徠安集民大悅服邊鄙士不知
學為之廣學宮崇禮教視事六載治行稱第一旋以憂歸服
除授河陰令謹河防蠲灘租平獄讞治法一如在滎昌時因
病歸里未幾卒子大年號天木康熙甲辰進士宰崑山民亦

頌之

胡世藻字友澄號潔庵東漸孫康熙丙辰進士初為寧德令勤於吏治政聲冠八閩卓異引

見賜蟒袍擢為四川正安州知州修學校立課程令諸生每月一集州署課試親為甲乙由是人才蔚起內升郎中歷兵戶兩部釐奸剔弊政務肅清分校禮闈所得皆知名士視學河南釐正文體甄拔者鄉會榜多居前列事竣例當修河世藻獨以清介免擢湖南參議地近苗疆每多蠢動世藻德威兼濟苗民向化百姓感之澧州建有生祠引年歸父老攀轅流涕者

千餘人卒後署邑令沈文崧為之傳祀鄉賢

李慎修字思永號雪山康熙壬辰進士由撰文中書擢主事出知杭州府整飭率屬吏治肅清雍正五年遷刑部陝西司員外郎晉廣西司郎中歷廣東浙江雲南司左右現審司前後十餘載多所平反嘗有京官某招一屠人作佃戶并貸以金屠人妻素淫乘屠醉縊殺之而誣京官某不能雪事聞命慎修審究又有某官侵匿帑金部議以挪移從未減慎修執不可其房師諷以

上意慎修曰恩出自

上若司官枉法是先自罹於法何以居官乎乾隆元年擢河南南汝
光道有白面包拯之稱紳民為建生祠慎修見之命易以范
文正公像嘗於城中高阜集士民講論孝弟睦婣之義多有
感泣者五年調湖北武漢黃德道凡盜竊奸宄聞將至相率
出其境旋調驛鹽道力却舊日陋規以憂歸服除補江南驛
鹽道

上曰李慎修老成直爽宜授御史職乃改授江西道監察御史指陳
時事盡言無隱尋授湖南衡永郴桂道過武昌商人感舊德
奉金為壽終弗受十二年解組歸優游林下者七載著有內

訟編吏治卮言倫理至言勸民俗話立繼說恤囚說檢驗說
諸書邑人韓尚夏為之傳

王世睿字道存號龍溪康熙乙未進士知四川廬山縣減賦除
稅撫輯有方會涼山蠻叛從巡撫征剿駐劄爐建隘口檢閱
金川九寺木坪魯密諸路上兵犒賞調遷軍士効命因語監
軍曰蠻人性不離巢若以圍師必却之術兼用人攻逼其後
賊逸而潰可成擒矣監軍用其言果大勝獲其渠魁以軍功
議敘權天全宣慰土司天全自唐時歸土司迄今已千餘載
世睿至鎮撫苗民條陳建官吏稽戶口科地畝清疆界編保

甲造軍器六事上官從之天全遂改土歸流後大兵討頗羅
粟復委運糧由內地至察木往返四閱月兵餉俱足又從剽
烏蒙鎮雄叛逆者均著勞績旋奉行取巡撫奏留天全舉所
議六事行之夷民大悅擢知瀘州將赴任奉委賚封印金幣
進藏出箭爐雪嶺黑海崑崙歷番國一十有四在瀘兩載利
興弊除因公左遷除江南江浦縣調上海捕蝗恤賑所至有
聲著有進藏紀程紀遇詩捕蝗記事若干卷

焦祈年字毅貽毓棟季子雍正癸卯進士授編修轉御史巡視
南城察萬安倉及五城街道皆洞燭情偽無敢欺者歷掌山

西河南京畿浙江江西各道事凡有闕國計民生者均詳悉
陳奏授順天府府丞權府尹遷右通政出為廣東觀風整俗
使至粵見婦女牽纜即禁除之下車後一切事宜無不權衡
至當建修十府二州書院延通人為之師濱海多盜出則乘
艦張蓋吏不能禁祈年設法鉤捕獲渠魁百餘人自是商無
被劫奸民陳某曾某以符劄煽惑人擒治之赦其株連者武
舉人余某交結嘯聚偵得其實論如律西洋人置天主堂愚
氓瞻拜無虛日乃逐其倡教者赴澳門粵俗以正簡閱各營
兵有紀律軍政肅然擢光祿寺卿晉順天府尹旋調奉天行

至山海關以疾歸卒於里

李廷榮字戟門幼穎悟強記十餘齡文譽騰起二十補博士弟子員由道光乙酉選拔戊子舉人第二名中乙丑進士授直隸新城令于役永定河歸見邑中饑民載道往謁制府琦文勤公於白溝懇為請卹至時已夜半制府呼燈命見備言災狀制府曰通案彙齊瀕發矣速入省白藩司猶可及如言往竟得補入民賴以蘇以卓異調玉田升宛平京縣權深州直隸州精於聽斷得色聽氣聽詞聽之旨清儉慈惠所至有聲去新城日百姓攀轅祖餞或泣下深州則稱二李謂廷榮及

恭毅公也制府訥以賢員薦引見

上曰朕知汝好官行大用汝補雷州府旋授荆宜施道甲辰夏江漲決隄水分流南北由門隙入城民聚避南門高處及四圍急命護米倉給貧者糧申警嚴防人情乃定久監大隄不辭勞瘁親督工役得怔忡疾謀引去制府裕莊毅公固留始己丙午移霸昌道途中摧順天府尹未履任改道員歸銓丁未授通永河道畿東三郡京省控案率歸道員審理所夕治訟累年積牘一清獄者歡頌己酉正月卒於任所著有紉香草堂文集二卷詩集十卷詩餘一卷四書文四卷試體詩律賦各

二卷夏小正詩一卷行於世長子恩黻癸卯舉人著有袖雲石屋詩二卷次錫澤壬子舉人皆以孝友文學著

孟鶴林字松野號雪堂舊軍鎮人道光辛卯舉人篤孝友輕財重施遇有義舉輒先之授四川蒼溪知縣抵任後矢廉介絕苞苴正風俗除宿弊平反疑獄發摘如神遷察木多軍糧同知卒於官族兄傳鑄為之傳

韓象鼎道光丙申科進士生姿颯爽賦性剛方居官勇果有為善理繁劇事無巨細剖決如流政聲卓著稱為循吏宰清豐時邑素多大盜擾亂數省會緝未獲實效象鼎抵任拏獲數

十名盜遂斂跡境內悉平直督詢公獎以明幹有為實心任
事補永年縣利興弊革安良除暴直督以克己辦公勞於民
事保薦尋蒙

召見對稱

旨欽加獎勵

賜以循良入覲四字回任不數月陞大名府知府象鼎性介直宦囊
艱澀不能迎合大吏遲月餘遂降陞大名府同知適南匪北
擾奉飭帶兵參辦軍務多出奇計戰勝攻克南匪退後象鼎
方四十餘歲即上稟告歸長吏慰留寅友亦致信相勸因答

書云莫道封侯無遠志誰云久客不當歸稟數上始准回藉
值捻匪東竄乃率本邑城東數十村鄉勇日夜團練防禦有
法衆志成城邑東鄉一帶安堵無恐者象鼎力也晚年於梭
山之麓購地數弓築茅屋草亭自號湛虛子名其園曰丰弓
廬其室曰行窩嘗自作一聯云老至何曾還好事歸來不過
且閑居日與友人登山飲酒談詩論文而塵世之跡遂絕
李延忠城南築竹園人道光甲辰舉人江南隨營効力旋帶黑
虎營時南匪猖獗擒殺無算匪首張樂刑勇悍無敵聞風奔
逸該省賴以肅清兩任鎮雄州值賊肆起親督衆禦之賊皆

披靡境內以安闔邑為立生祠供長生牌因升曲靖大理等府旋署兵備道

焦肇駿號友鴻為邑諸生文名噪於當時由咸豐辛酉科優貢中同治甲子科舉人戊辰科成進士入翰林散館選授廣西貴縣知縣歷署桂平富川賓州等州縣歷充光緒丙子乙酉科同考試官癸未年大計卓異升補奉議州知州同治十一年初蒞貴縣縣有惡風歲終諸無賴刁索商人痛懲一二首惡此弊遂革商人即會館中立長生牌供之光緒七年再蒞貴縣八年境內被災捐廉千金全活多人邑人為立生祠邑

舊有紫泉書院毀於兵燹廢棄已久為之興復士林至今尸祝賓州亦有生祠此皆犖犖大者其他政績不可枚舉

黃維翰字西園號梅村同治壬戌舉人甲辰進士初署江西建昌縣知縣勤聽斷獄無冤濫邑近鄱陽湖多水災適湖水漲溢沒民田廬以萬計公力請於大府發廩賑濟親為支放胥吏無能染指民賴以安繼授上猶縣知縣邑舊有永清書院廢弛已久初到任即為立課程加獎賞每逢大比量加資助一時人文為之一振邑有無賴子負博債投水死欲借尸以陷其仇維翰偵知之立為昭雪其人感德設生位每食必祭

後以病乞假回省士民揮淚相送明年復任民咸喜曰還我使君遂相率迎於道左維翰在任凡六年政簡刑清卒於任所宦囊空空幾無以殮而於公項毫無虧欠同官以為難卒之夜鄰城隍居民咸夢維翰蒞城隍任於是闔邑相傳其為城隍神云

高岱武字步峯沉毅有志畧從剿擒匪以軍功疊次保舉同治八年選授福建漳平縣知縣蒞任後却其陋規斷結積案以廉明稱數年為治惟以寬裕與民休息致仕回籍時攀轅祖餞者填溢街巷父老送至河干望見行李蕭條咸頌清廉不

置云壽至七十六歲無疾而終

附鄉賢

唐房元齡字喬彥謙子祀鄉賢傳載唐書按新舊唐書載元齡齊州臨淄人不志縣名考唐書天寶七年始改濟南為臨淄郡五載又更名濟南貞觀之世無臨淄郡此唐書疏謬處宋廉復居繡江側誦易種竹優游不仕年九十餘卒墓在縣東

南二十里祀鄉賢李格非作誌銘載縣志金石錄

元張養浩字希孟祀鄉賢傳載元史按元史本傳云濟南人未著縣名元翰林承旨姚燧所撰張氏先塋碑及其自撰先塋

碑現在邑東南相公莊旁相公莊名實以此歷城雲莊乃其
別業其祖葬焉養浩歿亦葬焉歷舊志列於流寓有以也至
據吾居雲莊而樂一語直謂歷城人非是

劉敏中字端甫祀鄉賢傳載元史

張起巖字夢臣延祐乙卯進士廷試第一傳載元史墓在縣東
南十五里相公莊祀鄉賢

明洪漢字天章成化壬辰進士工部主事累官江西參政平桂
林荆竹永福諸徭獠遷陝西左布政擢都御史巡撫大同條
陳地方便宜八事多見施行會朔州星隕於晝漢奏以為夷

狄侵中國之兆亡何邊帥失利漢上疏自劾并劾失事人竟
為中貴所構回籍閑住時有以白灰大書於朝堂者有陳堯
重賄翻留職洪漢無錢却去官之句臺省交薦漢才猷素著
宜同周經許進雍秦起用時忘者尚在竟不報歸田之日貧
不自給嘉靖中祀鄉賢

華珩字鳴朝宏治乙未進士為元城令振刷吏弊發摘如神又
能裁汰冗費與民休息元城民皆德之見大名府志擢監察
御史有直聲忤劉瑾瑾敗始不及難祀鄉賢

張茂蘭字德馨少有至性一介必慎取與中宏治乙丑進士知

鉅鹿縣為政簡易視民如子以外艱歸服闋起知任邱縣時
流賊劉六齊彥名等起霸州掠及縣境茂蘭築城誓眾散粟
哺饑民兵甲完具樓櫓屹然賊去之城賴以全時兵荒洊至
乃上救荒四事多見施行官柳為饑民剪伐或以言茂蘭曰
孟氏有言先仁民而後愛物歲饑窮民無所得食不得已析
木作薪採葉充食以緩須臾之死多厲禁乎又多市書籍以
勸學者兵荒之餘人不廢業羅文廟玘過縣茂蘭慕其文行
北面稱弟子御史以紀功至茂蘭不出迎被詰責茂蘭仰視
曰公此來何為者也御史怒曰奉命勦賊紀功令獨不聞乎

茂蘭曰賊去此幾何御史曰八百里茂蘭曰公以紀功為名
今相距八百里脫有冒功者何從知之不責已去賊之遠而
責令奉迎之近誠所未喻御史益怒面發赤久之曰何物縣
令強項若是亟驅車去亡何御史以事就逮茂蘭迎數十里
外廩餼甚腆時方嚴冬製衣裘以進史嘆曰令古人也煖不
增衣寒不減葉吾見其人矣茂蘭兩為令衣布飯脫粟不名
一錢不以妻孥自隨遷戶部主事餉軍遼陽封還羨金於官
使歸監稅臨清權舟九江終始以廉潔自勵時李夢陽視學
江西嘆曰張君非惟操守清氣味亦清其為名流嗟賞如此

考滿遷郎中總理宣府糧儲以疾固辭為給事中論劾調汝甯府通判甫三月遂棄官歸嘉靖改元給事中李錫疏薦詔起用會丁內艱既免喪巡撫王堯封繼薦之不赴久之起為河東鹽運司同知亦不赴築室長山之陰老焉茂蘭遷於經傳授徒山中經其指授者率有所成就如袁軒冕陳德安輩皆是也茂蘭嗜飲酒在太學友人以公罪下刑部獄聞獄囚日給酒願附名其末或問之答曰獄中誠不佳冀日可得酒耳嘗借史記漢書文選於縣人喬御史盛故靳之李太常問先問其故喬曰非吾靳此書疾此君不近人情招之不來耳

茂蘭聞之曰使借吾書東西南北唯喬君命東朝鮮西流沙
南交趾北居庸關所不敢辭太常曰居庸何近也笑曰吾畏
宣府耳正嘉中京師語曰天下清官張茂蘭在郎署日冬無
絮衣饋遺皆不受東阿劉戶部田解衣遺之乃受曰世惟劉
伯耕衣可服耳人以比陳師道云嘉靖乙未十月初三日病
起坐命索陶詩周子通書置袖中而瞑年六十五四子志仁
利仁守仁欲仁鄉人稱曰東谷先生祀鄉賢
王毅正統間歲貢生天性孝友居官以清介聞祀鄉賢
李冕字端甫天性穎敏嘉靖丙戌進士知魏縣事值連歲荒歉

民多流亡冕發粟賑貸所全活甚衆又能識拔如申燧王永壽輩皆稱名士行取御史累官至雲南右布政大率以潔已執法為務却餽遺不下萬金房無侍妾坐無雜賓獨喜施予戚友賴以舉火者數百家鄉人感其德立生祠祀之萬曆二十年祀鄉賢

張舜臣字熙伯號東沙少為諸生時負偏聲學使考試章邱得舜臣卷亟以解頭許之繼得德平葛與川卷復曰解頭必葛然張亦第二人也後揭曉果如其言嘉靖乙未成進士累官至南京戶部尚書舜臣為人機警言石砧落故所歷皆亨塗無坎

珂以疾歸至鄒縣卒著有東沙詩稿祀鄉賢

劉祿字惟學嘉靖甲辰進士授行人嘗使朝鮮國王餽遺甚厚
悉却之後官戶科給事中因疏救王尚書杲忤嚴相廷杖七
十謫荔浦縣典史未至即罷歸課農訓子外一無所營構一
亭曰思居飲酒賦詩以自娛隆慶初臺省交章薦祿不赴詔
復原職晉太常寺少卿萬曆二年祀鄉賢

胡來貢字忠夏嘉靖年歲貢生幼穎異工詩文為諸生時與李
冕讀書萊蕪山中寒餓不易其志後官宣城主簿祿俸外織
毫不染指左遷泰州吏目上治河八事旋以憂歸宦橐如洗

顧獨喜周人之急性忼爽好面折人非人亦以直諒許之著有鄉政直指南游紀行待焚諸藁藏於家祀鄉賢

張如式官衡水縣知縣祀鄉賢

胡東漸字向若萬厯乙未進士初筦銀庫一塵不染擢吏部郎遇銓除請託不行人咸服其剛正累官至提督操江南京都察院右僉都御史時魏忠賢叱咤熾甚索寄庫銀四十萬兩東漸竟不與遂免徵派吏民獲安機房胡太監請廢營為逆璫建祠東漸立拒之後祠成東漸不拜璫遂矯旨勒令致仕怡然就道時論賢之著有向若詩稿崇禎年祀鄉賢

焦馨字甯考號衡芷萬歷辛丑進士除中書舍人兩奉使命饋遺一無所受官兵部時嚴覈虛冒郵政肅清遷河南按察使備兵大名豪強懾伏值八道并缺兼握數印措置裕如轉布政備兵磁州統毛武勇三營申嚴軍紀躬自校閱月餉悉手自給散士伍咸樂為用擢山西布政時山右歲賦皆供三鎮軍餉其繇司解京者止新加地畝一項馨不啓原封弟署一公移令原解官自行輸納督餉科道合疏公薦奉旨紀錄頒行為天下式授都察院右副都御史巡撫甯夏抵鎮會秋防凱旋馨親具羊酒勞軍得首功者以絳繒裹大錐繫諸頸下

以示鼓勸又築城於要害興屯於荒徼立商學清市本以規
永久時逆璫生祠幾遍天下甯甯鎮將吏屢以為言馨曰倘有
禍我獨當卒不建祠後南省以事撫拾馨馨即解組歸辛未
戊寅有兵警倡捐備禦眾賴以安卒賜祭葬贈工部侍郎太
史唐夢賚為之傳著有棟雲齋文集祀鄉賢

甯光先字忠門萬曆丙辰進士歷五任游至巡按直隸監察御
史以進賢絀惡為急務薦舉有司凡三十六劾官三薦將林
官二十四劾將領官一奉旨云此疏獨得體要嘗有天下本
稿甯光先之句又特薦致仕吏部尚書崔景榮兵部侍郎馬

從聘大名道丁魁楚時魏璫燄熾上疏力擊其奸有為魏立
生祠者按律治之又於刑獄多所平反但有一隙生機即為
駁問者百餘人其反復推敲確有可開者亦得數十人其上
免派召買一疏尤為通商惠民要務至稽邊餉以節財用守
關塞以固要害察驛遞以施軫恤皆蒙上獎勵以嶙峋氣骨
直大精神許之著有本稿十四卷論二道表二道判十則藏
於家沒祀鄉賢

呂懋修字孟玉號欽所由副貢生游陞山西絳州學正思不越
畔言不浮行又察士之好修者獎之不及者策之於是相觀

而化不敢以虛憍恃氣託之剛果凌厲詞察託之高明放侈
踰檢託之恢宏斌斌然復良士瞿瞿之舊焉復捐俸修聖廟
及學署致仕後設教家塾課子孫以自娛著有唾餘詩稿康
熙五年崇祀鄉賢

國朝焦日培號心植馨子也秉性孝友博學嗜古為諸生試輒前列
後隨父任數千里廕成均期滿應赴部投職不忍違親遂不
仕父卒伏闕請卹得賜祭葬侍母羣曲盡孝道與弟日芬友
愛無間幼女字甯氏以壻瞽辭婚日培不可卒歸之辛未歲
饑土賊竄起給邑令曰單騎臨我我當受撫令信之不為備

日培知其詐力阻今日是必有謀不可信為密設方畧而後
招之賊計奪乃就撫是時兵燹之餘遺骸相望日培偏瘳之
甲申乙酉間

詔求巖穴之士邑令欲以日培應以病辭徜徉衡泌以終其身以子

毓棟貴贈奉政大夫吏部稽勲清吏司郎中祀鄉賢

韓之俊天啓辛酉舉人登癸未明通榜順治間由國子監監丞
歷任工部都水司主事凡闕國計大端朝夕籌度不遺餘力
常語僚友曰為臣者當實心任事無負所學鞠躬盡瘁宜三
復也後游陞通惠河道疏通利源不遺纖悉土人咸祝之後

解組歸里置南北二園時同故舊詩酒相娛怡然自得與子弟輩講說經義直挾前賢所未發督憲朱匾其門曰清華蔚望邑人袁聲為立傳祀鄉賢

袁聲號荆陽崇禎癸未進士順治間官山西嵐陽令時嵐以逆關脅土民寇城內外咸嫌因致山民結聚時出標掠聲單騎招撫各皆投誠獨高九英不與聲請二十四部兵共大師七千乃克成擒時人心未定聲隨村撫慰見顏垣僵尸為之大慟民皆感泣秋分校秋圍得士七人聯蜚者四督撫以勤於政交章奏聞擢為邢部貴州司郎中去之日號聲震地卧輟

板轅者無數因立祠於東門內祀之在部三年多所平反出
為太平府知府興利除害一塵不染公餘即事吟咏一時名
流仰之著有春秋鼎麟經滙海八十卷通鑑世系詩詞便覽
藏於家惟荆陽詩紀二十種行世祀鄉賢

焦毓瑞字輯五號石虹馨之孫日芥子也順治丁亥進士任御
史時巡視漕倉則恤旗丁免耗折巡按宣大則招流亡葺學
校課農桑巡鹽河東酌定成規使鹽斤不盈不縮商民稱便
及官刑部右侍郎用法寬恕多所平反太湖縣民因事行財
法司擬以授受同科律應死毓瑞曰受者百二十金乃為滿

貫以授者分計三人各四十金法止杖耳律云皆計所得是其證也奏請得末減遂為定例調兵部右侍郎值滇黔用兵夙夜在公不遑休沐及吳逆平勞績懋著康熙壬戌上元

賜晏乾清宮

上手金卮賜酒

詔賦柏梁體詩毓瑞有天河洗甲通蠻鄉之句轉戶部左侍郎悉心任事以疾卒

恩賜卹典馳驛歸葬著有南游草詩祀鄉賢

郝奇璋字符玉天性純孝生十有三歲而孤事孀母備極色養

明季之難負母而逃事定始歸其姊貧而寡為置田宅訓其諸孤凡族黨子弟有貧不能讀書者俱延師成就之濟困扶危終身不倦里人奉為矜式祀鄉賢

李元緇字葉初連朝孫也性至孝篤信程朱之書身體力行始終不倦其學以誠敬為主端謹之士多出其門處鄉黨恂恂如而一種至誠惻怛之意令人心服首肯桀驁之徒對之而氣自消遠近學者爭以識面為幸學使劉旌其門曰孝養績學咸豐中捻匪賴文洸擾山東元緇所居舊軍為章邱城北巨鎮恐賊據為資因與鄉人議築土堡抵禦籌畫精詳附近

諸村入堡避賊者皆安插有法全活甚衆他如建書院立義塾修志書舉節孝事闢風化者皆樂為之不疲由歲貢生中道光乙酉順天舉人同治元年舉孝廉方正授鉅野縣訓導中丞丁文誠公聞其賢飭委監理尚志書院門人孟憲璋謂其行道有得出入宋賢堂奧有注釋五子近思錄注釋居業錄藏於家學者稱青函先生光緒三十二年祀鄉賢

附忠義

唐李君球齊州平陵人載唐書良吏傳

明李繼孜豪邁有膽力嘗大書王彥章豹死留皮人死留名語

嘉靖間應募北邊有功授濟南衛左所鎮撫又備倭於蘇州
等處至彩桃江遇倭船力戰死加升濟南衛左所世襲百戶
子如金承襲

馮時英字平庸崇禎初以孝廉任邢部主事遼經畧舉其才能
改任遼東都司指揮僉書管經畧大廳事備邊多策後與當
事不協以文臣不曉武事奏罷時英去遼東亦失後明亡嘔
血數升以卒

國朝柴震龍順治年歲貢生選江西興國縣知縣遇金逆之變捐軀
殉難其子朝賓明賓俱死贈江西按察司僉事廕一子復於

嘉慶七年准震龍六世孫長清襲恩騎尉世職因替

崔可訓字秀卿魁梧奇偉素有智畧家貧不能讀遂投身行伍
時康熙雍正間西寇跳梁六師進討可訓執爨前驅從征
十二年當兩軍對壘不脫甲者四十餘日倦則以足履鞞倚
馬而憩及脫盔髮落矣值元日黎明寇突來可訓執刃乘馬
突入賊軍立斬三十餘級追賊陷入坑塹中危急間馬忽躍
出又奮斃數人大軍乘勢追襲遂獲全勝奏首功賜職千總
事平擢即墨守備乾隆九年升遊擊卒於官

張冠軍字勇三有勇畧乾隆間入戎行習騎射撫憲長甚器之

授撫標左營司廳旋擢禹城汎把總會川楚賊匪久未平至嘉慶初復揀汎司有幹畧者往往征之冠軍與馬抵軍所值大雷雨賊衆數萬猝至衆皆驚冠軍不為動單騎遇敵曾不少挫繼我師與賊隔一兀突河相持月餘冠軍乘夜匹馬渡河偵知賊方設夜宴優俳雜進多有醉卧者馳歸白主帥身率士卒奮勇爭先遂奪賊寨二十四處竟夜之力且戰且進得賊佔據地二百四十餘里主帥敘勲冠軍居最凡歷行陣計七年親督百餘戰臨幾決策所向無敵後擒其賊首羅其清陝甘諸部落亦取次削平於七年九月凱旋以功授梁山營

都司調沙溝營都司遂卒年五十四歲

王守京係湯陰知縣珠裕遠祖居埠村夏秋間適野有銀包重約五六百許計包數負歸園中井旁有石起之挖藏其下仍覆以石雖妻子秘不以告積數年偶憇村旁樹下見有客聯鑣過憇遽問數年來此間有暴富者乎守京駭問即前失銀者也約客詣井旁起石舉銀還客客大驚願仍為守京壽或以半數為謝均不可客乃白諸邑侯旌其門曰善人

劉英魁武生明大義有膽畧道光年間入營咸豐同治間戰績昭著卒於防次光緒三十年入祀省城昭忠祠

顏懷蘭字香圃道光壬辰科舉人任冠縣教諭尚節義慷慨有
膽畧咸豐初年髮捻擾亂東境四年春三月匪自南來薄城
懷蘭率其孫錫祉與同城官登陴助守悉力抵禦賊不得上
乃暗分股從北門急攻城陷守土官一時遇害賊謂其職居
學官可不死懷蘭與孫罵賊不止被賊刃傷遍體祖孫同時
殞命賊直入學署錫祉妻王氏抱週歲子振華亦因罵賊同
遇害忠孝節義萃於一門奉

諭旨從優議恤

張士超字越泉優廩生道光甲午科舉人大挑以知縣用分浙

江乙卯分校鄉闈所得皆知名士初知青田縣減賦除稅以
廉正寬簡為治旋調湯溪邑號難治下車後恩威並施盜賊
皆斂迹七年補松陽縣八年三月粵匪擾境因捐貲團練督
衆禦賊兩次獲勝斃賊無數至二十三日賊匪麇至合圍衆
寡不敵猶手刃數賊力竭陣亡一時助戰死者千餘次子監
生鴻翮亦陣亡事平後浙撫晏保奏晉知府

恩賞雲騎尉世職並賞給祭葬銀兩紳民建祠奉祀因送輓聯云

捍大難禦大災功德在民痛定爭揮慈母淚臣盡忠子盡孝
彝倫立極靈歸無愧聖人鄉子鳳翮襲雲騎尉世職

翟登義字梅峯嘉慶乙卯解元道光辛丑進士歸蒲臺縣本任
教諭咸豐初部選廣西梧州府藤縣知縣時賊勢猖獗蒞任
後募勇守城賊至率勇登陴拒守力竭無援城破與子贊采
俱戰死事載廣西殉難錄

田密基支馬頭人咸豐辛酉南捻入章境此村被害特甚田率
子禦賊被賊攔裹使牽馬伊父子抗言死則死耳斷不為賊
役遂皆遇害其妻隗氏與媳郭氏見夫死恐被賊污各携幼
子幼女共投一井閭家七口無一存者

附節烈

唐盧氏房元齡妻元齡微時病且死謂盧曰吾病革爾年少不宜寡居善事後人盧泣入帷別一目以見志會元齡愈禮之終身封梁國夫人

宋李氏名清照號易安處士格非之女天才秀發詞筆妙麗適翰林承旨趙明誠明誠所著皆資其潤色紹興中校勘明誠金石錄三十卷表上之所著有漱玉集校勘金石錄後序打馬賦一卷傳於世

明申記兒正德間山東盜起時避賊不及被執罵不絕口賊怒曰何物女子倔強乃爾遂遇害邑人袁公冕為之傳見邑志

國朝夏氏平涼府同知張羽種繼室之婢也羽種故後宦囊如洗子
邦符方幼弱夏氏維持調護辛勤備歷至老死不適人後張
氏子孫感其義歿葬於張氏塋側迄今祀之

沈氏教諭緒瑛女廩貢生韓獻基之子延烈妻也于歸未三載
夫病垂危睨沈感額若有所思沈解其意曰君可善自調養
無過慮也夫額之而痰上湧不復言矣沈急備棺衾覩無人
而先自斃夫亦瞑目逝矣前邑侯蔣箬公詠曹烈婦云一死
相隨世有之大都夫子不聞知曹郎獨有生前慰却是餘輝
返照時即謂兼詠沈氏也亦宜

辛氏沈雲鵬妻候選州同辛爾藻女也于歸二載雲鵬染時疾
辛在母家聞而奔歸侍夫疾晝夜服侍形神若癡夫歿投繯
自縊時七月酷暑面色如生蠅蚋遠避不集蒙前撫憲袁題
請


旌表得蒙 恩准建坊

牛氏幼字王姓廷鳳未婚而廷鳳歿女聞之暗自垂淚父母欲
改字之女泣然曰未嫁而寡即他適若已嫁將如何是吾命
也願守終身母不聽改字之女潛詣亡夫家改粧拜姑姑不
忍召其母勸之女作色曰昔為牛氏女今為王氏婦矣必欲

旌表


強我誓以死繼遂聽之家貧甚紡績奉姑無少懈以姪為嗣
撫如已出年六十餘以壽終

劉氏邵武縣知縣高淑勛妻隨侍任所後淑勛病劉晝夜調養
卒後氏即欲以身殉為眾勸解乃勉強扶柩歸里葬畢飲醢
而死邑令周詳請



人類

本境除漢人外僅有回民一種自明代始傳入本境其清真寺在大冶莊聚族而居共三百餘戶又有分住小冶莊準村普濟鎮三處共數十戶城關僅數戶



戶口

全境五十六里共八百零二村莊共六萬九千三百九十七戶又收併濟南衛一百一十四戶

旗戶無


漢戶

縣境男丁二十一萬六千八百三十三名

女口十五萬五千三百八十六口

併衛男丁五千二百七十四名

女口五千二百七十七口



章邱縣鄉土志門類目錄

卷下

氏族

宗教

實業

地理

山

水

道路

物產

商務

氏族

張氏先世臨洮人也大宋乾德二年避亂徙棗強至金章宗四年漳河水決百里無稼復徙章邱明正德間居邑之張公巷汝蘊明萬厯庚辰進士官至陝西按察司副使其後瓜綿椒衍科甲纍纍家慶明萬厯舉人篤行順治丙戌進士辛卯典試河南遷建南分巡道官至按察司僉事鑛順治舉人涇康熙副貢任州同夢白康熙進士任知縣永熙進士雍正舉人濯清朝琛康熙舉人皆任學正玉式乾隆明通進士任知縣思式乾隆拔貢舉人當時汝蘊子孫多授魏科思歲廩附諸

生不可枚舉至今氏族昌熾散居各村列膠庠者尤蟬聯不絕云

焦氏原籍直隸棗強縣明初遷居章邱縣戶口甚多支姓繁衍馨前明萬曆辛丑進士官甯夏巡撫右副都御史日芬

國朝以歲貢官江西建昌府推官毓慶以拔貢官江西永新縣知縣御寇殉節毓瑞順治丁亥進士官翰林院庶吉士官至戶部左侍郎日藻順治丁酉武舉宏年以貢生官掖縣教諭毓棟康熙巳未進士官吏部考功司郎中毓鼎康熙辛未進士官湖廣鍾祥縣知縣綏祚康熙癸巳進士官內閣中書奉天經歷

祈年雍正癸卯進士由翰林院編修官至奉天府府尹汝夔
雍正癸卯舉人汝益雍正丙午舉人爾厚乾隆庚午舉人官
貴州遵義府知府式冲乾隆壬辰進士官知縣以潤乾隆己
酉進士河南淮甯縣知縣友麟道光癸巳進士翰林院編修
改官御史山西學政肇瀛道光甲辰進士由翰林庶吉士改
廣西貴縣知縣起騫由蔭生官湖北巴東縣知縣日芬以下
皆馨子孫也至今邑人稱為望族

孟氏亞聖裔明初遷居邑之舊軍鎮代有聞人羣推望族廷狀
乾隆甲子舉人廷對乾隆丙戌進士官雲南建水直隸盧龍

福建崇安等縣知縣毓荀乾隆戊申舉人毓健嘉慶乙卯副
貢官昌樂縣教諭雲峯由廩貢生官昌樂縣教諭戶部廣東
清吏司主事鶴林道光辛卯舉人官四川蒼溪縣知縣前藏
察木多軍糧同知傳汝道光乙未舉人官東阿費縣等縣教
諭傳鑄道光丁酉拔貢官直隸趙州州判鈺道光甲午舉人
鄒縣教諭懷川官貴州思州府知府傳璵官中城兵馬司指
揮憲璋同治甲戌進士官河南扶溝縣知縣廣模光緒庚寅
進士官刑部主事繼笙江蘇候補道廣涵光緒丁酉舉人其
他遊庠食餼以孝友異行稱者難以悉數

王氏世居邑東南十五里相公莊有明以來科甲纍纍春舉春
騰春蛟春鯨皆明武舉君實康熙副貢廂黃旗教習家斌康
熙武舉文鍾雍正舉人其恂乾隆拔貢萬清乾隆武舉以均
嘉慶舉人延壽啟芳皆由歲貢任知縣海林守勛道光武舉
家璋歲貢任訓導宸誥欽賜副貢鴻聲光緒甲午副貢列邑
庠者尤衆族姓繁衍為一村之冠

胡氏原籍棗強明初徙邑之三盤莊或居城或居鄉自明鄉賢
僉都御史東漸以後代出偉人世藻康熙丙辰進士累官至
布政使參議祀鄉賢九霞乾隆庚午舉人子襄子翼乾隆庚

辰同榜舉人予襄官刑部主事予翼官濱州學正族支繁衍
於邑稱最

謝氏原籍棗強明洪武二年徙邑之城裏或分居各村謙景泰
舉人官蒲州知州九敏嘉靖舉人任知縣九儀嘉靖壬辰進
士累官至兵部左侍郎啓光萬歷丁未進士官至尚書葆光
天啟武舉官至都司世爵順治乙酉武解元己丑武進士官
泗州衛守備斌順治甲午武舉支派縣延五百餘戶實大族
也

高氏明初由棗強遷邑之西關或散居各村世以詩書孝友傳

家棟明宏治舉人官河南南陽府通判外官知縣者二人官
鴻臚寺光祿寺寺三人官通同者二人官佐雜者十人應祀
歲貢生官元承縣丞工詩詞著作甚富頗潛心經學著四書
憶解星命醫學諸集兩戲太平拾策錦城功烈皆嘉慶閒武
舉汝梅道光辛巳舉人官內閣中書志城庚子舉人官新泰
訓導赤城楓諭督官兵馬司指揮湘城歲貢生官萊州府教
授建勲援例任趙州知州鑑清咸豐辛酉拔貢八旗漢教習
毓蕙同治甲子舉人揀選知縣毓蘭增貢生任日照縣教諭
保升知縣淑勳光緒乙酉舉人官邵武縣知縣鍾璐廩貢生

任掖縣教諭現致仕家居淑怡甲午副貢候選教諭淑恂庚
子辛丑并科副貢士瑛附貢生現任青城縣教諭始遷至今
共二十五世人丁繁衍於邑稱望族焉

宗教

回教詳見人類

天主教自康熙初年始傳入本境迨咸豐光緒年間又續添教堂計胡迪莊教堂一處教民一百二十四人三盤莊教堂一處教民十人四盤莊教堂一處教民九十六人滕棚莊教堂一處教民四十人明水寨教堂一處教民十二人共計天主教二百八十二名

耶穌教自光緒十四年始傳入本境其後又續添教堂計張家林教堂一處教民二十九人油房莊教堂一處教民三十

人北辛莊教堂一處教民十八人毛家店教堂一處教民三十人辛王店教堂一處教民二十六人潘家莊教堂一處教民四人鬪雞台教堂一處教民十三人東彩石教堂一處教民四人孟家莊教堂一處教民七人本城教堂一處教民三十五人各流莊教堂一處教民三十四人席家莊教堂一處教民五十四人共計耶蘇教二百八十四名

實業

農居十之五商居十之三士與工十中之二而工居多數

商

縣境戶口甚繁土穀所出不足以供食指故懋遷有無在本境者猶少而在外州縣以及外省者恒多凡章邱人所設店舖皆用鄉里人作夥如濟南如周村如津滬漢口等處其大較也城鄉自鹽當而外無多大商以東西間於周村省城商埠間也

士


邑中惟經商者多故士不免有紛志然潔已好修者亦不乏人自科舉停學堂立除由科甲各入仕途外或赴東洋北洋遊學或至高等師範肄業者尚數十人餘則多由速成師範畢業教授鄉里初級蒙學而已

農

縣境無曠土以務農者衆也成頃之田大戶可以指數若成畝而自食其力者比比皆是且農戶之家兼樹藝故農婦亦得課桑麻

工

邑多山而取材甚富者莫石工若徧觀各處坊表橋池以及
官廨寺觀之基礎往往精緻工巧不為怪也又鐵工在城鄉
者十之二在外府以及各省者甚多每年春出冬歸習以
為常無鄉鎮無之餘工皆如常不見多數



地理

章邱縣在濟南府之東北一百十里

四界 東界鄒平縣二十里至鄒平縣城六十里 南界萊蕪縣八十里至萊蕪城一百八十里 西界歷城縣二十里至歷城縣城一百一十里 北界齊東縣四十里至齊東縣城九十里

四隅 東南至淄川縣界六十里至淄川縣城一百一十里 西南至歷城縣界七十里 西北至濟陽縣界六十九里至濟陽縣城七十里 東北至鄒平縣界至齊東縣界各計三十

里

邑分六鄉在城曰闕廂鄉東北曰清平鄉西曰西錦鄉東曰東錦鄉南曰明秀鄉北曰下三鄉今改名正字鄉分闕廂鄉為九里清平鄉為九里西錦鄉為九里東錦鄉為十里明秀鄉為十里正字鄉為九里共五十六里

古蹟

土鼓城 在縣治東南二十五里明水鎮東

陽邱城 在縣治北七里回軍鎮

水寨城 在縣治西北二十里今水寨

衛國城 在縣治西南五十里雞山園

亭山城 在縣治西南六十里

肥鄉城

博平城 在縣治東南三十里博平鎮

甯戚城 在縣治東北二十五里

獠城 在縣治西北一十五里俗名古城

管城

崔氏城 在縣治西北七十里大清河之濱俗名土城

臨濟城 在縣治西北六十里臨濟鎮

東朝陽城

東平陵城

全節城

譚城

臺城

廣宗城

高唐城

樂盤城

清平軍

在縣治東南五十里文祖鎮

在縣治南二十七里

在縣治北十五里舊軍鎮

營城

賴亭

標竿鎮

聊城

頓邱城

延安鎮

今為齊東縣地

白子友嘯臺

在平陵城南山

釣魚臺

在縣治南十八里高三丈方十餘丈上有姜太公

嚴子陵廟有井深不及臺之半四時不竭號曰懸泉

鬥雞臺

在縣治西南五十里雞山園

甘澍亭

在女郎山金縣令劉思溫建

繡江亭

在縣治東繡江東岸

飲江亭

在縣治東南五里元縣令李惟肅建

含輝亭

在縣治東南五里元劉文簡敏中建已廢

野亭

劉文簡敏中建

濯纓亭

在縣治東南二十餘里明水鎮東麻灣上張受益

建

藏雲亭

在縣治東南十五里元浙江行省參政張友諒建

柏軒 在縣治西南頓邱莊齊處士宋慶餘築

三辛樓 在縣治北邑人喬岱建以祖木正統辛酉父奉先

成化辛卯岱宏治辛酉先後中禮魁故名

望江樓 在縣治東繡江之濱前明正德年知縣呂秉彝建

中麓書院 在縣治西南隅邑人李開先建

萬卷藏書樓 在縣治西南隅李開先建

馬文閣 在縣治西南隅李開先建

思慮亭 在縣治北八里耿家莊邑人劉祿建

大觀樓 在女郎山明萬曆年知縣王振熙建

鐘樓 在縣治西南有監察御史李錦堂重修記

巽峰塔 在縣治東南城上

樂山亭 在縣治東長白山下邑人劉茂蘭建已廢

漪漪亭 在明水鎮邑人康迪吉建

南園 在明水鎮邑人康大猷置竹木千章構亭曰竹亭因

以自號云

北園 在明水鎮北康大猷置

余青園 在縣治西三里許邑人焦馨歸田時所創置也

芙蓉館 在縣治西南隅邑人袁聲建

嘯園 在梭山之陰邑人李縉明建

露園 在縣治南二里許邑人焦毓棟置為遊憩之所竹木
蕭森亭閣軒敞

石筍亭 在縣治東南邑人弭光崇建

繡江園 在縣治北回軍鎮邑人劉渡建

御筆亭 在西頓邱莊乾隆二十七年壽民王欣然王瑞然兄弟恭
建

猗清園 在明水鎮邑人康星燾置饒有竹木水泉之勝

周鄒衍墓 在縣東十里

王燭墓 在縣東十五里

漢酈食其墓 在縣北臨濟鎮南

劉敬墓 在縣西十餘里有大冢相傳為敬墓

平陵王墓 在縣西南四十里危山之巔墓旁有祠

周登墓 在危山之陽

終軍墓 在臨濟鎮西南

馬融墓 在臨濟鎮南

隋房彥謙墓 在縣西南七十里趙山之陽

宋穆賓墓 在女郎山之陽

廉復墓 在縣東南二十里廉家坡

金朮虎通墓 在女郎山前

元劉敏中墓 在縣東南五里西泉莊

張友諒墓 在縣東南十五里相公莊東南

張養浩先塋 在縣東南相公莊

張起巖墓 在相公莊東南

魏誼墓 在縣東南西奉莊

劉府君侯墓 在女郎山後端巖峯左側

明洪漢墓 在縣西南十五里

劉棠墓 在縣北三十里張家林鎮西

雙烈墓 在女郎山

烈女申記兒墓 在縣北十五里舊軍鎮

楊烈婦墓 在縣東五里山頭店西

夏時墓 在女郎山

華珩墓 在女郎山

張茂蘭墓 在縣東十五里

張舜臣墓 在縣西十五里

謝九儀墓 在縣南三里賜祭墓

劉潤墓

在縣東山頭店

李冕墓

在縣南二十里明水鎮西

王曷墓

在縣西北四十里王家寨

康廸吉墓

在縣南二十里

楊選墓

在縣東二里

李開先墓

在縣南三十里賜祭墓

劉祿墓

在縣北五里

王儀鳳墓

在縣南四里

張應吉墓

在縣西南三里

淄川巡撫韓浚墓 在縣東南

淄川巡撫畢自肅墓 在縣南三十里

焦馨墓 在縣南一里賜祭墓

國朝謝啟光墓 在縣南二里

焦毓瑞墓 在縣南一里

歷城布政朱絳墓 在趙山之陽

李慎修墓 在縣東南二十里鳴羊山麓

焦祈年墓 在縣南

崔可訓墓 在縣西南四十里劉官莊

焦爾厚墓 在縣西南西花園莊西

祠廟

聖廟 在縣治西南隅

明倫堂

尊經閣

文昌宮

名宦祠

鄉賢祠

忠孝祠

節義祠

敬一箴亭

社稷壇

山川壇

先農壇

邑厲壇

關帝廟

坊表

旬宣坊

在布政分司門外

肅清坊 在按察分司門外

務本坊 在東街口

力田坊 在西街口

由義坊 在南街口

溥化坊 在北街口

狀元坊 在繡江橋西為張起巖建

進士坊 為洪漢建

攀龍坊 為洪漢建

方伯坊 為洪漢建

都憲坊 為洪漢建

進士坊 為張晟建

冲霄坊 為張晟建

世科坊 為劉棠建

恩榮坊 為劉棠建

進士坊 為劉樂建

恩榮坊 為華珩建

柱史坊 為王昂建

少司空坊 為王昂建

方伯坊 為李冕建

父子進士坊 為袁弼袁軒冕建

恩榮奕世坊 為袁軒冕建

吏部坊 為李開先建

進士坊 為謝九儀建

恩榮坊 為謝九儀建

大中丞坊 為謝九儀建

少司馬坊 為謝九儀建

兩部亞卿坊 為張舜臣建

大總憲坊 為張舜臣建

總牧兩京坊 為張舜民建

司諫坊 為劉祿建

欽授坊 為楊選建

恩榮坊 為李化龍建

世薦鄉書坊 為袁通袁弼袁慶袁公冕袁勳袁軒冕建

世魁坊 為喬奉先建

鄉進士坊 為劉澍建

從龍坊 為馬驄建

攀蟾坊 為周具瞻建

鄉進士坊 為謝謙建

容臺坊 為司賓署署正高進建

鄉進士坊 為劉坦建

兄弟舉人坊 為袁軒冕袁公冕建

勅贈吏部郎中坊 為李開先之父李瀉建

勅贈少司空坊 為張舜臣之祖張統建

勅贈通議大夫坊 為張舜臣之父張燦建

勅贈監察御史坊 為楊選之父楊盈建

勅贈兩世罔卿坊 在明秀門內為胡東漸之父建
勅贈三世中丞坊 為焦馨之祖焦崢父焦瑁建

烈女坊 在舊軍鎮為申記兒建

雙烈坊 在城隍廟南為姜守身妻楊氏婢盛兒建

橋梁

錦江橋 在縣治東南明水鎮前明隆慶六年重修道光十
二年康星燾倡修

西泉橋 在縣治東南眼明堂東

繡水橋 在縣治東南淺井莊東

高家雙橋

在縣治東南後營莊東

南繡江橋

在縣治東南宮王莊東

樊家莊橋

在縣治東南

南太平橋

在縣治東南三盤莊

金盤南橋

在縣治東南

金盤北橋

在縣治東南亦名壽金橋

北繡江橋

在縣治東

臨江橋

在縣治東北漁家莊

近江橋

在縣治北口看頭莊

從化橋

在縣治北回軍鎮

鼎新橋

在縣治西北大溝涯

濟涉橋

在縣治西北水寨鎮南

豐江橋

在水寨鎮西

永濟橋

在水寨鎮西康家莊

跨江橋

在縣治西北張家林鎮

普濟橋

在縣治東南普濟鎮東

永度橋

在縣治東南東皋莊

潔河橋

在縣治東茂李莊東

濟衆橋 在縣治東石家堰東

朝陽橋 在縣治東山頭店

清平橋 在縣治東北田官莊

聯石橋 在北太平橋南

北太平橋 在縣治北刁家莊

通濟橋 在縣治北鮑家莊西

集錦橋 在萬山莊

壽山橋 在集錦橋南

荆木橋 在龍化莊

迎仙橋

在荆木橋西

興隆橋

在龍化莊南

碌磳橋

在十九郎莊

裕泉橋

在碌磳橋西

東太平橋

在李家莊南

連海橋

在海套園

龍泉橋

在龍寨東

漂上橋

在石棚西南

繩峪橋

在繩峪莊北

蒙坡橋 在蒙坡塔西

龍門橋 在羅家莊南

利濟橋 在涼水泉下

大成橋 在大柏莊東北

河溝橋 在滴水泉下

百花橋 在東鈞突泉下

丹陽橋 在鳳嶺北

溝南橋 在小柏莊北

烏龍橋 在月灣泉上

馬鞍橋

在海套園內

雙龍橋

在侯家莊東

土泉橋

在土泉上

馬頰橋

在麓泉上

三空橋

在萍香泉上

官道橋

在石棚東

芙蓉橋

在西趙莊

甘泉橋

在池子頭東

玉泉橋

在玉泉莊南

大道橋 在東埠莊

梭山橋 在梭莊中

利津橋 在舊軍鎮

渠野橋 在小龍堂

市鎮

里之為鎮者十有八

舊軍鎮 埠村鎮 普濟鎮 清平鎮 文祖鎮 明水鎮

張家林鎮 魏郭林鎮 滑口鎮 大寨鎮 博平鎮

大冶鎮 危山鎮 段家橋鎮 水寨鎮 辛家寨鎮 柳

塘口鎮 臨濟鎮

鄉之設集者三十

東關 西關 南關 北關 埠村 辛家寨 山後寨

普集 臨濟 水寨 刁家莊 明水鎮 相公莊 段家

橋鎮 山頭店 舊軍鎮 博平 大寨 清平 回村

辛店 十八戶 郭太師庵 張家林 清口 柳塘口

王家店 呂家寨 頓邱 司家莊

學堂

官立高等小學堂 一處

官立初等小學堂

八處

師範傳習所

一處

民立高等小學堂

四處

民立初等小學堂


十六處

半日學堂

一處

勸學所

一處



山

長城嶺 在縣治南百餘里南連泰安萊蕪界東至劈林尖山
接淄川界西至天羅頂連歷城界俗名長林嶺上有古長城
遺跡相傳齊所築以禦楚西距平陰東距大海

天羅頂 在縣治西南百餘里來脈自歷城東南梯子山經紅
泉峪連陰棧二山峭壁競秀章邑西南諸山無高於此者上
有四界石南泰安東萊蕪東北章邱西南歷城也巨河發源
於山東峪中

西龍洞 在縣治西南六十餘里山洞深邃入數里許有泉一

自上滴下下有石盆盛之四時不竭遇旱取水禱雨輒應旁石壁有龍形隱隱可見

石棚頂山俗名石棚溝在縣治正南九十餘里亦係連界之山周十餘里南秦安西歷城東南萊蕪東北二面皆章邱地縣南諸山皆自此發脉瓜漏河發源於此

雙尖山在縣治南七十里石棚頂之北山有兩峯陡插青雲

如燈燭狀此大治河自山北來

馬頭山在縣治西南五十里寨山西北雙峯連峙狀如馬鞍

關盧水出其東麓水經謂之馬耳山肥鄉巨里城自山拖脉

寨山 在縣治南六十里雙尖山西北山多古柏

雞山 在縣治西南五十里有雙水泉亦為關廬之源自以上均

脉發

危山 在縣治南四十里

黑牛嶺 在縣治西南五十里

平頂山 在縣治南七十里

胡山 在縣治南五十里脉自黃巢頂來至此山五十餘里陡

起一峯極高大東南以望連峯沓嶂與長白之摩訶峰南北

對峙為章邱之巨鎮

龍盤山 在縣治南二十八里小胡山西北十餘里

小峨嵋山 在縣治南二十五里脉從胡山之東麓河套西山迤邐而北至縣境明水之東南結為邱陵是為小峨嵋俗又呼為埠頂東麻灣之水即從此山根沸騰而出

東陵山 在縣治南十里莊子盜跖死葬東陵之上

桃花山 在縣治西南八里今名史家山

女郎山 在縣治北一里山頂有三陽洞相傳葆光子學道於此

分水嶺 在縣治南四十五里水南北分流北流逕紅溝莊西

折入溝頭莊南流逕狐山南西北流逕周家莊至溝頭莊南與北流合而入瓜漏河

野狐嶺在縣治東南八十里又名分水嶺水自嶺東西分流東者入淄川西者入章邱為獺河之上源

劈林尖山在縣治東南九十里許為章淄萊蕪接界之山
杈杆山在縣治東南四十餘里入長白第一峰也

長白山在縣治東界羣峰羅列綿亘四邑統名長白此山跨四縣之境北隣鄒平而近東北去長山而遠東入淄川西南二面入章邱實海岳之神皋仙靈之窟宅

摩訶峰 在縣治東三十里長白中峯也四山環拱巍然秀特
高出諸峰上山巔有塔有禪院

水

巨合水 在縣西南七十里水經云巨合水南出雞山者誤也

出雞山者係關盧水上源考巨合源出章邱縣西南百里長

城嶺之拔槩泉西北流經完糧峪榆科泉莊東虎門莊中又

西北流經中泉洋河崖土屋東至大龍堂會諸峪之水又北

流經塔窩南折而西北流至兩岔河西南左會稍全康泉南

泉東泉澤科土頭諸峪之水二水相合兩岔河村所由名也

又西北經東彩石小龍堂東又東北經東山坡北又東北經

窪裏村東又西北至講書院東入歷城界在章邱界內又北

流經擡頭東又北流經龍山鎮西又北右與關盧水武原水
合又西北為全節河以全節城而名也又西北經城子莊龍
泉寺盤龍莊至鴨王口東四風閣北即昔時巨河注小清河
處也今則經鴨王口西北北流而百澗溝水及郭店莊東河
韓倉河併白泉漫泉及團泉當道諸泉水入壩子河東北流
經遙墻西注巨河西北流經青甯寺東又西北入大清河
榆科泉 在縣西南七十餘里榆科東南泉源競發入巨合
拔槩泉 在縣西南百里泉出山半涓涓不息下有漿水泉
關盧水 在縣西南六十里水經注云導源馬耳山今名馬頭

山

武原水 在縣西南五十里水經注云武原水出譚南平澤中世謂之武原泉北經譚城又北經東平陵故城西又北經巨河城東其水合關盧水而出注巨合水

白雲湖 舊志云在縣西北七里周六十里白雲湖一名劉郎中陂舊雖有泉未必成湖實因夏雨秋霖章邱瓜漏河迤西平陵城迤東併亭山河危山迤北之水隨溝北注漚而為湖今介在歷章之間東南曰師行西南曰徐家莊西北曰老僧口北曰鄭社馬頭皆屬歷城得湖之七其東屬章邱得湖之

三昔由東北三里趙官橋莊南注小清今小清故道淤塞東
北流至水寨康家莊北入清河今湖水漸竭惟湖心尚生蘆葦
墨泉 在城西北十里閭馬莊南以水色如墨故名

瓜漏河 在縣西南七里許每夏秋暴雨則溢至城南與繡江
合盈涸不常時或為患瓜漏河源自石棚溝東會長城北諸
峪之澗水東流經官營莊西南轉而東南經百丈崖下會涼
水泉又東南流經車廂香石臺莊南又經邵莊東北至明杜
莊南石崖洩然入地即前志土人所名滲水灣每遇夏秋霖
潦洶湧汎溢北流經石匣莊北又北經南苗莊北苗莊東又

北經石屋莊中又東北經沙灣莊西又西北至月宮莊西右
納東南泊輪泉仰泉水又東北經準村東至陶莊東左納大
冶河水源自雙尖山北諸峪水東北流經大冶南東南流入
漏河又東北經河下莊南右納酒頭山子水及紅溝水又東
北經李官莊站裏南皋準東又東北折而西北經釣魚臺西
又西北經洛莊東又北流經朱各務石皋莊東轉而東北經
三盤莊西又東北流至全盤莊西南北橋入於繡江
繡江在縣東一里芹藻浮動水紋如繡故名繡江源自明水
鎮東百脈泉北流至錦江橋南右納東麻灣龍眼泉左納康

氏園內全鏡泉玉帶河長川河諸水匯而為一北流經鎮東
折而西北流左納鎮西南竹園清水泉北流至古槐壇磨北
右納乾河水西北流水多磬折至顏家磨南分為二支一支
東北流名大洋溝灌溉東北諸莊地畝入楊緒溝其經流又
西北至沙河口南左納西麻灣水源出明水鎮西山北麓發
地皆泉愈流愈湧北流至堂子橋左納明淨泉水又北流經
硯池山東北左納狼溝水又東北流會沙河口諸支流之水
析而至此復合又西北經沈家磨東營莊折而東至鐵心壩
一支北流入韓家閘其經流折而北至高家橋南右納顏家

磨地洋溝水又西北經果子園又北折而西經李家亭南至
李家磨東左會韓家閘水又西經宮王莊西北轉而北經樊
家莊東折而西至冢家磨折為二支又西至四盤莊東復合
又西經三盤莊南折而北經西皋莊西又西經全盤莊北至
三盤磨左會瓜漏河又北經縣城東折而西北經康家莊南
又西北經回軍鎮中即水經注所云又西北經水寨西水經注所
云西北出城又西北至王家橋左納白雲湖水又東北經涓
經黃中固也口西即昔時入小清處也又北流經新莊東左納羅坡河水
又北經劉家莊東左納土河水又北經延安鎮西注於大清

河此河縱橫章邱境內百餘里

百脈泉 在縣南二十五里明水鎮東繡江源也

張公池 在百脈泉南之龍泉寺大悲閣南縣令張萬青有惠政邑人德之鑿此池以志遺愛故名

乾河 在縣東南二十五里明水鎮東北值夏秋霖雨山水湧

溢鎮東北莊村每至沒田禾壞廬舍前邑令議請與小清河一律挑濬下流俾免水患此邑上游東南鄉之急務也源自

朱家峪栗家峪西北流經官莊南折而西北經東澗西莊東又西經石河莊北左納第五峪諸水西北流注繡江

落坡河 在縣西北五十里西起羅家莊東北坡地勢窪下恒有水患康熙年邑令史在篇度高下疏河自牛家窪起至郝家溝注繡江邑人德之為立祠因名史公河

土河 在縣西北七十里臨濟鎮東北野狐寨之北宣洩臨濟鎮北諸坡行潦之水東北行數里至西柳寨入齊東界經曹馬頭北草廟頭注繡江

陳愷溝 在縣北二十五里成化時宣洩小清河水由薛渡口逕滾水壩入齊東減河東北流逕城東注大清河今跡尚存邑人陳愷即倡議開溝之人故名

潁河 在縣東五里潁河源出野狐嶺之石門村北流經石棚

莊南右納黃花滴翠二泉水左納五岔溝水折而西至普集

鎮北右納玉泉古海泉不竭師公諸泉水左納七女泉小岔

河又西至博平鎮南即水經注所云楊緒溝左納硯池芙蓉

溝南盤泉水右納玉液北盤泉諸水又西北流至相公莊西

北龍灣右納天台峪水又北流經房莊東皋莊間右納車門

峪水左納滋澆溝長流即繡江旁出自大洋溝來水也又北經石家堰山頭

店東右納上方井聖泉水又西北經玉皇頂西刁家莊中北

流入萬家口其經流至柳塘東南入小清即水經注所云經

章邱城東又北逕

甯戚城西而北此獺水之源流也
流注於濟水也

小清河在縣北三十里每遇積雨獺水浩悍其居上游者刁家莊一帶則患埧高壅流其居下游者段家橋鄭家道口一帶則又患埧低冲决往往相爭高下訐訟所賴有司時加疏濬此邑東北鄉之急務也

新清河在城西北三十八里原因深水舊跡增而深之自縣境趙百戶寨接歷城界入境東北會繡江河由五龍堂入齊東境縣境所轄共十里

黃河在城西北七十餘里自咸豐五年北徙借大清河故道

入海上接歷城縣之濠溝而北而東下接濟陽縣之直河縣境所轄南岸計長四十餘里自同治光緒間河身淤淺屢經口決沿岸數百村疊遭水患房屋冲沒地多沙押民生彫敝大清河自咸豐五年黃河奪其道其名遂失

道路

東路 自縣城東渡繡江河至山頭店八里由此抵炭張店十
二里接鄒平界

東南路 自縣城至相公莊十五里又八里至博平鎮八里至
香集鎮由此復折而南十里至青野八里至石門村又二十
里至三臺莊則接淄川界

南路 自縣城二十里至孫官店八里至大踏莊又八里至鷺
莊十里至準村鎮十二里至文祖莊再由此十里至大寨十
五里至錦陽關接萊蕪界

西南路 自縣城南十五里至史家莊又十里過劉家莊再十五里至孫村由此十二里至小龍堂又十八里至邢村與歷城接界

西路 由縣城八里至溫家莊又十二里至二十里舖再五里至辛店接歷城界

西北路 由縣城十里至大溝崖又二十里至塘頭莊再由此二十里至十八戶十五里至紅廟又五里至胡家岸與濟陽歷城犬牙交錯接界

北路 由縣城十五里至舊軍鎮十里至清口再十二里至五

龍堂接齊東界


東北路由縣城十五里至刁家莊又八里至柳塘口再十里
辛家寨接鄒平齊東兩縣界

水路或由山發源或平地出泉俱詳本志水門舟楫不通者
皆由沿途附近居民利設水磨節節蓄水惟新清河在城西
北三十八里原因漂水舊跡濬而深之自趙百戶寨上接歷
城來源入境至張家林以北入小清河計十里以東直達壽
光縣之羊角溝往來帆檣不斷又黃河上游自胡家岸起下
至張虎店一帶計五十餘里非舟筏無以利涉焉

山路 東南兩面極多固有大路平坦者亦有軌轍不通者如
東路由山頭店赴鄒平長山等處沿途雖多山而皆有寬平
大道可行惟東南自黃巢頂起迤邐天倉嶺野狐嶺四豎山
劈林尖諸山此數十里內車馬難行西南山路由西龍洞轉
接長城嶺復折而西天羅頂諸山層巒疊嶂林壑崎嶇計由
邢村南至歷城千佛山以東仍有四五十里往來行人多有
歎馬瘠僕痛者故縣境東西孔道現在以鐵路為最

鐵路 名曰膠濟鐵路在縣境之中界由濟赴膠則自西而東
從歷城界之斜溝莊入境由膠赴濟則自東而西從淄川界

之王村入境中間共設車站三處中曰明水東曰普集西曰棗園並於三處添設巡警房共十四間每處各派巡兵數名以為警察道途之備計東西所轄六十餘里



物產

天然產

五穀之屬黍稷稻穀麥豆秫藁芝麻

蔬蔬之屬芥韭葱蒜瓜茄瓠白菜辣菜苔菜菠菜生菜芹莧
芸萹苣當苘蒿萹薑菁山藥芋盧菹胡盧菹蘆筍蒲笋苻
藻芡白芡芡藕子

果之屬桃李杏棗羊棗栗梨梅子柿柰山楂石榴蘋婆果沙
果蜜果文果核桃櫻桃蒲桃木瓜木梨

鱗介之屬魚蝦蟹鼈蛤蜊

禽之屬鷄鵝鴨雉鴿燕鵲鳩鸛布穀倉庚啄木禿鶯鴛鴦鷓鴣
鷓寒號蟲

獸之屬馬牛騾驢犬羊豕貓狼兔獾狐狸刺蝟

草木之屬松柏楊柳榆槐楸桑柘榭荆檜椿椒楮梧桐黃楊
棟段木胡木竹葦蒲菖蒲書帶草

花卉之屬海棠臘梅木蘭棠棣丁香夜合牡丹芍藥菊荷木
槿木棉秋葵玉簪薔薇凌霄刺梅月季石竹鳳仙蜀葵水蓼
鷄冠盆蓮剪春羅金錢玫瑰水仙

藥之屬防風柴胡遠志黃芩蒼朮苦參桔梗天麻地榆甘草

地黃薄荷艾蘇葉淡竹葉扁蓄瞿麥黃精半夏天南星紫草
石膏益母草豨薟草夏枯草香附五味子還筒子蛇牀子車
前子木鼈子急性子華麻子黑牽牛白牽牛桑白皮桑螵蛸
馬兜鈴金銀花紫花地丁

襍產蜜臘菸葉蕙苾煤炭砗磲石灰上水石
製造產

章俗樸素小民勤勞所製物產每於農隙為之物雖不多錄
之可備一格

絲布 桑皮紙 草紙 香末 石灰 炭 鐵器 水磨

布疋

巾帶

布紗

毡貨

窰貨

商務

鹽務額粟計一萬二百五十六張鹽重三百九十觔業商史復
興史恒升史長正史一舉史芝岩史復順等六股租商濟泰
昌一家總號設南門裡大街分店設前關山頭店炭張舖韋
陀東關郝莊辛家寨柳塘口青楊林舊軍回軍大溝崖刁家
莊漯河崖東寺段家橋大義田辛店甯家埠張馬頭馬棚水
寨遠家莊張家林高官寨臨濟集南柳莊呂家寨大寨十八
戶席道口準村曹范山後寨李福莊頓邱孫村邢村普集相
公莊上泉莊祖營塢常坡莊牛牌莊十九郎莊明水王白莊

站裏等處銷售

當商現存八家恒茂號在東關永裕號在西關公祥號在舊軍
惠吉號在準村金城號在相公莊廣聚號在普濟鎮恒興號
在山後寨惠昶號在馬棚莊


錢商現存六十餘家分為五鎮城關曰兩鎮準村山後寨曰南
鎮刁家莊平家寨水寨舊軍曰北鎮相公莊普濟曰東鎮
燒酒現共一百十餘家在本境銷售間亦外銷鄰縣每年約共
銷一百萬九千片上下

潤布向稱貢品近也奉文停辦尚有綿線布洋線布二種以平

家寨所織為最銷京莊及近邑

鐵器自山西運來在本境銷售並發行鄰縣

陶器產自城南窰頭莊就地取土埽埴無方粗足成兼出石灰
比屋皆然以其價廉而工省也本境鄰境皆銷售



是書門類綦繁選錄從實亦如邑乘之有徵邑乘修於道光
癸巳前知縣事吳璋距今七十餘年矣淵自承乏茲土屢欲
續修竊以簿書鞅掌且俗吏無良史才故未敢率爾從事非
愬然也歲己巳

國家詔停科舉廣立學堂案初等教科有所謂歷史輿地格致
者其義理樸實精深欲令知方若無善本都中編書局監督
有見於此咨請

大部條奏後通咨直省大吏分命各地方守土官編纂鄉土
志以進蓋欲以習見習聞之事養成知愛知敬之原意美法

良洵裨初學謹繹編纂大旨注重簡括固不能盡本志書而體例亦實相等至如原刊條目之兵事氏族宗教實業等類志無專門尤須編列正所以重科教也政值維新人惟求舊時設局之任采訪者有邑紳前掖縣訓導縣視學高鍾璐暨江蘇試用道孟繼笙總其事且參以孟紳瑞箴李生芳馨手編之舊本復得邑之舉人李洪鈺王翰李敦益丁慶長分纂之淵則於公餘暇日按目考查依例選錄合而編之俾不冗不遺上備採擇焉爰記起訖於篇末

光緒三十有三年春山東章邱縣知縣海州楊學淵謹書後